

四庫全書

子部

欽定四庫全書

子部

廣博物志卷二十三

四

詳校官侍讀學士_臣沈咸熙

主事_臣祁韻士覆勘

總校官知縣_臣楊懋珩

校對官中書_臣石鴻翥

謄錄監生_臣劉宗望

欽定四庫全書

廣博物志卷二十三

明 董斯張 撰

閨壺

賢母

賢婦

節婦

才婦

孝女

封丘者高祖與項氏戰厄於延鄉有翟母者免其難故以延鄉為封丘縣以封翟母焉

陳留風俗傳

崔發事王莽位至大司空母師氏通百家之言莽以殊禮加之號成義夫人金印紫綬乘文軒丹轂

後漢書

漢馮異欲從光武其母囑之曰汝今盡忠莫思盡孝我自為計以絕子內顧之念遂縊而死光武即位命建廟祀之廟在饒陽縣上

郭丹後母為鬻衣裝賣產業與從師長安上

秦瑛南鄭楊相妻大鴻臚劉巨公女也有四男二女相亡教訓六子動有法矩長子元珍出行醉母十日不見之曰我在汝尚如此我亡何以帥羣弟子元珍叩頭謝過仲子仲珍白母請客既至無賢者母怒責之仲珍乃

華行交友賢人兄弟為名士秦瑛之教流於三世四子才官隆於先人故時人為語曰三苗口止四珍復起

華陽

國志

江夏孟宗少遊學與同學共處母為作十二幅被其隣婦怪問之母曰大其被以招貧士之卧庶聞君子之言

耳

列女傳

陶侃為潯陽縣吏常監魚梁以鮓遺母湛氏封鮓及書責侃曰爾為吏以官物遺我非惟不能益吾乃以增吾

憂也范逵曰非此母不生此子

晉書

朱序鎮襄陽苻堅遣將圍之序母韓氏自登城謂西北
角當先受敵遂領百餘婢并城中女子於其角斜築城
二十餘丈賊攻西北角果潰衆便守新築城賊既退人
以此城為夫人城上

苻堅幸太學博士盧壺曰廢學既久尚傳零落周儀禮
注未有其師竊見太常韋逞母宋氏世傳父業今年八
十視聽無闕自非此母無可傳授於是就宋氏家立講

堂置生徒百二十人隔絳紗帳而受業號宋氏為宣文

君周官學復行於世

前秦記

王大司馬母魏夫人性甚嚴整王在湓城時為三千人將
年踰四十少不如意猶捶撻之故能成其勲業

家訓

任遥妻河東裴氏高明有德行嘗晝卧夢有五色采旗
蓋四角懸鈴自天而墜其一鈴落入懷中心悸因而有
娠占者曰必生才子遂生昉年十二從叔晷有知人之
量見而稱其小名曰阿堆吾家千里駒也

南史。以下賢婦

蔡人之妻者宋人之女也既嫁於蔡夫有惡疾其母將改嫁之女曰夫之不幸乃妾之不幸將何去終不聽其母而作采芣之詩

列女傳

楚野辯女者昭氏之妻也鄭簡公使大夫聘於荆至於狹路有一婦人乘車與大夫轂擊而折大夫車軸大夫怒將執而鞭之婦人曰君子不遷怒不貳過今於狹路之中妾避之已極矣而子大夫之僕不肯少引是以敗子大夫之車而反執妾豈不遷怒哉既不怒僕而反怨

妾豈不貳過哉上

楚莊王使使齎金百斤聘北郭先生先生曰臣有箕帚
之使願入計之即謂婦人曰楚欲以我為相今日相即
結駟列騎食方丈於前如何婦人曰夫子以織屨為食
食粥毳履無怵惕之憂者何哉與物無治也今如結駟
列騎所安不過容膝食方丈於前所甘不過一肉以容
膝之安一肉之味而殉楚國之憂其可乎於是遂不應

聘與婦去之

韓詩
外傳

伯宗朝以喜歸其妻曰子貌有喜何也曰吾言於朝諸大夫皆謂我知似陽子對曰陽子華而不實主言而無謀是以難及其身子何喜焉伯宗曰吾飲諸大夫酒而與之語爾試聽之曰諾既飲其妻曰諸大夫莫予若也然而民不能戴其上久矣難必及子子盍亟索士慙庇州犂焉得畢陽及欒弗忌之難諸大夫害伯宗將謀而殺之畢陽實送州犂於荆

國語

陶谷子治陶三年名譽不興家富三倍其妻獨抱兒而

泣姑怒曰何其不祥也婦曰夫子能薄而官大是謂嬰

害無功而家昌是謂積殃妾聞南山有玄豹霧雨七日

而不下食者何也欲以澤其毛而成文章也故藏而遠

害犬彘不擇食以肥其身坐而須死耳今夫子不脩德

而家益厚敗亡之徵見矣期年而答子果以盜誅

列女傳

節乳母者魏公子之乳母秦破魏殺魏王瑕誅諸公子

而一公子不得令魏國曰得公子者賜金千鎰匿之者

罪至夷節乳母與公子俱逃魏之故臣曰今魏國已破

亡族已滅子匿之尚誰為乎母吁而言曰夫見利而反
上者逆也畏死而棄義者亂也今持逆亂而以求利吾
不為也且夫凡為人養子者務生之非為殺之也豈可
以利賞畏誅之故廢正義而行逆節哉遂抱公子逃於
深澤之中秦軍追見爭射之乳母以身為公子蔽夫着
身者數十與公子俱死

列女傳

杜有道妻嚴氏字憲女韡有淑德傳立求為繼室憲便
許之時立與何晏鄧颺不穆晏等每欲害之時人莫肯

共婚或曰何鄧執權必為玄害亦猶排山壓卵以湯沃雪耳奈何與之為親憲曰晏等驕侈必當自敗司馬太傅獸睡耳吾恐卵破雪消行自有在

晉書

陶潛妻翟氏與潛志趣同能安苦節夫耕於前妻鋤於後

劉凝之妻郭銓女也亦能不慕榮華與凝之共居儉苦夫妻共乘薄笨車出市貿易周用之外輒以施人

並上

魏姚氏婦楊氏閭人符承祖姨也承祖為文明太后所

寵楊氏謂其姊曰姊雖有一時之榮不若妹有無憂之
樂常著破衣自執勞事承祖遣人乘車往迎之楊不肯
起遣人彊輦致車上反大哭言爾欲殺我也以是符家
內外皆號為癡姨及承祖貶有司執其二姨至庭姚氏
婦衣裳敝陋持免罪

史

荀遂字仲陽隱居不仕時歲饑荒來糴者遂妻常昂其
斛糴者歸量輒過其本時人號為昂斛夫人

荀氏別傳

陳順謙成固人也順謙適鄧令曹寧十九寡居長育遺

孤八十餘卒兄弟陳規著書歎述之惠謙適張亮則在
扶風官下吏白欲重禁嚴防以肅非元脩訪於惠謙惠
謙曰恢弘德教養廉免耻五刑三千蓋亦多矣又何加
也兄弟伯思學僊道惠謙戒之曰君子疾沒世名不稱
不患年不長也且夫神僊愚惑如繫風捕影非可得也
伯思乃止陳伯臺稱云女尚書之後耳

華陽
國志

禮脩趙嵩妻趙氏女也姑酷惡無道遇之不以禮脩終
無愠色及寧父母父母問之終引咎不道姑卒更寤更

慈愛之鄉人相訓曰作婦不當如趙伯高妻乎使惡姑知變可為婦師矣後姑病女來省疾姑却之曰我死固當絕於賢婦手中後遭來賊高死乃碧塗面亂首懷刀託言病賊不逼也養遺生女依父叔立義終身者也

上

朱百年卒會稽守蔡興宗餉其妻孔氏米百斛孔遣婢

詣郡門固辭時人以比梁鴻妻

南史

梓潼太守苟金龍妻劉氏者平原人也宣武時金龍為
郡梁人攻圍會金龍疾病不堪部分劉遂厲城人脩理

戰具拒戰百有餘日兵士死傷過半成副高景陰圖叛
逆劉與城人斬景及其黨與數十人自領將士分衣減
食勞逸必同莫不畏而懷之并在外城尋為賊陷城中
絕水渴死者多劉乃集諸長幼喻以忠節遂相率告訴
於天俱時號叫俄而澍雨劉命出公私布絹及至衣服
懸之城內絞而取水所有穢器悉儲之於是人心益固
會益州刺史傅豎眼將至梁人乃退豎眼嘆異之具狀

奏聞宣武嘉之

史

魏尚書令王肅博學多通才辭美茂高祖甚重之先仕
齊日聘謝氏女為妻及至京師復尚公主謝作五言詩
贈曰本為薄上蠶今作機中絲得路逐勝去頗憶纏綿
時公主代肅答謝云鍼是貫綿物目中恒任絲得帛縫
新去何能衲故時肅甚有愧色

洛陽伽藍記

賀德基少遊學於京邑積年不歸衣資罄乏又耻衣服
故弊盛冬止衣夾襦袴嘗於白馬寺前逢一婦人容服
甚盛呼德基入寺門脫白綸巾以贈之仍謂德基曰君

方為重器不久貧寒故以此相遺耳德基問姬姓名不

答而去

陳書。以下節婦

貞女引一曰處士吟魯次室女倚柱悲吟而嘯隣人曰
欲嫁耶何吟之悲也女曰嗟乎吾傷民心悲而嘯豈欲
嫁哉自傷懷潔為隣人所疑於是褰裳去之入山中見
貞女廟喟然太息援琴歌曰繫骸骨於林兮託神靈於
貞女自縊而死或云見女貞木而作歌亦謂女貞木歌

琴操

思歸引一曰離拘操衛侯有女邵王聞其賢請聘之未至而王薨太子欲留之女不聽拘於深宮欲歸不得援琴而歌曲終縊而死或云離拘操箕子所作也

衛侯女嫁於齊太子中道聞太子死問傅母曰何如傅母曰且往當喪喪畢不肯歸終之以死傅母悔之取女所自操琴於冢上鼓之忽二雉出墓中傅母撫雉曰女果為雉耶言未畢俱飛而起遂不見傅母悲痛因作操

曰雉朝飛

並上

魯陶嬰妻者夫死守志不二作歌詩曰悲夫黃鵠之早寡七年不雙宛頸獨宿不與衆同夜半悲鳴想其故雄天命蚤寡獨宿何傷寡婦念此泣下數行嗚呼悲哉死者不可忘飛鳥尚然況於其良雖有賢雄終不可重行

列女傳

韓樹南南鄭人趙子賤妻也子賤初為郡功曹李固之誅詔書下郡殺固二子憲公季公太守知其枉遇之甚寬二子託服藥死具棺器欲因出逃子賤畏法敕更驗

實就殺之及固小子變得還子賤慮變報讐賃人刺之
變覺告郡殺子賤初樹南諫子賤子賤不從及臨死許
共并命兄弟嫂侍婢視守之經百餘日乃怠白兄嫂念
一死萬不得生不敢復圖死也上下以為信然無幾時
於幕下自殺

華陽
國志

蜀郡張貞行船被溺死貞婦黃因投江就之積十四日
執夫手自浮出

異苑

陸績於鬱林所生女名曰鬱生適張溫弟白姚信集有

表稱之曰臣聞唐虞之政舉善而教旌德擢異三王所
先是以忠臣烈士顯名國朝淑婦貞女表迹家閭蓋所
以闡崇化業廣殖清風使苟有令性幽明俱著苟懷懿
姿士女同榮故王蠋建寒松之節而齊王表其里義姑
立殊絕之操而魯侯高其門臣切見故鬱林太守陸績
女子鬱生少履貞特之行幼立匪石之節年始十三適
同郡張白侍廟三月婦禮未卒白遭罹家禍遷死異郡
鬱生抗聲昭節義形於色冠蓋交橫誓而不許奉白姊

妹嶮嶮之中蹈履水火志懷霜雪義心固於金石體信
貫於神明送終以禮邦士慕則乞蒙聖朝斟酌前訓上
開天聰下垂坤厚褒鬱生以義姑之號以厲兩髦之節
則皇風穆暢士女改視矣

三國志注

二寡婦者淑也曷也淑喪夫守寡兄弟將嫁之誓而不

許

杜預女記

呂榮者吳郡許升之妻也升為賊所害榮貞烈自守黃
巾賊陳寶欲穢之榮執節不聽寶遂殺之是夕疾風暴

雨雷電晦暝寶恐懼叩頭葬之而去廩府君聞榮高行

出錢助縣為冢因名曰義婦阪

列女後傳

永初中廣漢中羗反虐及巴郡有馬妙祈妻義王元
憤妻姬趙曼君妻華夙喪夫執共姜之節守一醮之禮
號曰三貞遭亂兵迫匿懼見拘辱三人同時自沉於西
漢水而沒死有黃鳥鳴其亡處徘徊焉國人傷之乃作
詩曰關關黃鳥爰集于樹窈窕淑女是繡是黼維彼繡
黼其心匪石嗟爾臨川邈不可獲

華陽國志

陰喻早卒荀采豐少父爽奪之以適郭奕因令左右辦浴既入室以粉書扉上曰尸還陰陰字未成懼有人來以衣帶縊死

晉書

伏見族祖吳國亡民富春孫彥妻環少厲令節服膺道教逮嫡孫氏恪居婦職宗姻有聲奉禮未周彥母喪殯喪殯半年彥奄亡沒環率禮奉終抗義明節傾竭私產以供葬送禮服既終前無立子家欲改醮誓而不許

鈕滔

母孫氏瓊與虞定夫人薦環夫人書

霸城王整之姊嫁為衛敬瑜妻年十六而敬瑜亡父母
舅姑咸欲嫁之誓而不許乃截耳置盤中為誓乃止遂
手為亡壻種樹數百株墓前柏樹忽成連理一年許還
復分散女乃為詩曰墓前一株柏根連復並枝妾心能
感木類城何足奇

南史

宋末娼家女姚玉京嫁襄州小吏衛敬瑜溺水而死玉
京守志養舅姑常有雙燕巢梁間一日為鷺鳥所獲其
一孤飛悲鳴徘徊至秋翔集玉京之臂如告別然玉京

以紅縷繫足曰新春復來為吾侶也明年果至因贈詩
曰昔年無偶去今春猶獨歸故人恩既重不忍復雙飛
自爾秋歸春來凡六七年其年王京病卒明年燕來周
迴哀鳴家人語曰王京死矣墳在南郭燕遂至墳所亦
死

唐李公撰燕女墳
記。以下才婦

班昭女妹曹豐生亦有才慧昭著女誠豐生為書以難
之辭猶可觀昭年七十餘卒所著賦頌銘誄問注哀辭
書論上疏遺令凡十六篇子婦丁氏為撰集之又作大

家讚焉

東漢書

皇甫規妻善屬文能草書

上

壽張女子張雨早喪父母年五十不肯嫁留養孤弟二人教其學問各得通經皆為聘娶成善士謝夷吾為令

薦於州府使各選舉表復雨門戶

謝承後漢書

趙姬者桐鄉令東郡虞璉妻也璉既沒大皇帝敬其文才詔入宮省號曰趙母作列女傳解注賦數十萬言

晉鍾毓兄弟警悟過人每嘲謔未嘗困躓嘗女會有女

善調謔往觀於是盛飾共載行西門一女子笑曰車中
央殊高毓等初不覺車後門生云向已被嘲鍾愕然門
生曰中央高兩頭低也蓋言羝也兄弟多髯故云談載

左貴嬪名芬兄思芬少學善綴文名亞於思武帝聞而
納之泰始八年拜脩儀受詔作愁思之文因為離思賦
後為貴嬪姿陋無寵以才德見稱體羸多患常居深室
帝每遊華林輒回輦過之言及文義辭對清華左右侍
從莫不稱美帝重芬辭藻方物異寶必詔芬為賦頌

郗氏羲之妻也甚工書有七子獻之最知名玄之凝之徽之洸之操之并工學隸凝之妻謝道韞亦善書而有才華甚為舅所重

婦人吳郡韓蘭英有文辭宋孝武時獻中興賦被賞入宮宋明帝時用為宮中職僚及武帝以為博士教六宮書學以其年老多識呼為韓公云

南史

前秦苻堅時秦州刺史扶風竇滔妻蘇氏陳留令武功道實第三女也名蕙字若蘭識知精明儀容秀麗謙默

自守不求顯揚行年十六歸於竇氏滔甚敬之然蘇性
近於急頗傷妬嫉滔字連波右將軍真之孫朗之第二
子也風神秀偉苻堅委以心膂之任備歷顯職皆有政
聞遷秦州刺史以忤旨謫戍燉煌會堅寇晉襄陽慮有
危逼藉滔才略乃拜安南將軍留鎮襄陽焉初滔有寵
姬趙陽臺歌舞之妙無出其右滔置之別所蘇氏知之
求而獲焉苦加捶辱滔深以為憾陽臺又專伺蘇氏之
短讒毀交至滔益忿焉蘇氏時年二十一及滔將鎮襄

陽邀其同往蘇氏忿之不與偕行滔遂携陽臺之任斷
其音問蘇氏悔恨自傷因織錦廻文五采相宣瑩心耀
目其錦縱廣八寸題詩三十餘首計八百餘言縱橫反
覆皆成文章其文點畫無缺才情之妙超古邁今名曰
璇璣圖然讀者不能盡通蘇氏笑而謂人曰徘徊宛轉
自成文章非我佳人莫之能解遂發蒼頭賁至襄陽馬
滔省覽錦字感其妙絕因送陽臺之關中而具車徒如
禮邀迎蘇氏歸於漢南恩好逾重蘇氏著文詞五千餘

言屬隋季喪亂文字散落追求不獲而錦字迴文盛見

傳寫

武后御製

齊鮑令暉詩齊韓蘭英詩令暉歌詩往往斷絕清巧擬古尤勝昭嘗答孝武云臣妹才自亞於左芬臣才不及太冲爾蘭英綺密甚有名篇又善談笑齊武謂韓云借使二媛生於上葉則玉階之賦紈素之辭未詎多也

盧虔後妻元氏升堂講老子道德經虔弟元明隔紗帷

以聽之

鄴洛鼎峙記

陳後主以宮人有文學者袁太捨等為女學士

陳書

女侍中魏元乂妻也女學士孔貴嬪也

煬帝至廣陵備月觀行宮有郎將自瓜州進合歡果帝
命小黃門以一雙馳騎賜吳絳仙遇馬急搖解絳仙拜
賜私附紅牋上進曰驛騎傳雙果君王寵念深寧知辭
帝里無復合歡心帝歎曰絳仙不獨貌可觀詩意深切
乃女相如也亦何謝左貴嬪乎

大業拾遺
以下孝女

晉敗齊師齊侯遂自徐關入見保者曰勉之齊師敗矣

避女子

使避君也齊侯單還婦人不知之也

女子曰君免乎曰免矣曰銳

司徒免乎曰免矣曰苟君與吾父免矣可若何奔齊侯

以為有禮既而問之壁司徒之妻也

壁司徒主壘壁

子之石窀

石窀邑名濟北盧縣東有地名石窀音留左傳

宣城郡青陽縣有梅根治孝女李娥娥父吳人文帝時

為鐵官冶以鑄軍器一夕煉金竭鑪而金不出時吳方

草創法令至嚴諸耗折官物十萬即坐斬仍又沒入其

家而娥父所損折數過千萬娥年十五痛傷之因火烈

遂自投於壚中赫然屬天於是金液沸湧溢於壚口娥
所躡二履浮出於壚身則化矣其金汁塞壚而下遂成
溝渠泉注二十里入於江水其所收金凡億萬斤溝渠
中鐵至今仍存故吳俗每冶銅鐵必先為娥立祠享而
祈福

紀聞

漢雍青東郡民之女母疾積年青扶持左右四體羸瘦
村里乃斂錢營助湯藥母痊許嫁同郡周少君少君疾
病未獲成禮乃求青母見青託以其父母青許之俄而

命終青以供養其父母為務十餘年中公姑感之勸令更嫁青誓以匪石後公姑並自殺女姑告青殺之縣收拷捶遂以誣欺刑於市青臨刑語監殺者曰乞樹長竿繫白幡青若殺公姑血入泉不殺血上天血乃緣幡竿上天

蜀郡太守王子雅南陽西鄂人有三女無男而家累千金父沒當葬女自相謂曰先君生我姊妹無男兄弟今當安神立宅翳靈后土冥冥絕後何以彰吾君之德各

出錢五十萬一女築墓二女各建石樓以表孝思樓高可丈七八柱圓圍二丈有餘石質有綠光可以鑑窮功綺刻妙絕人工

水經注

宜陽縣有女子姓彭名娥父母昆弟十餘人為長沙賊所攻時娥負器出汲於溪聞賊走還正見塢壁已破不勝其哀與賊相格賊縛娥驅出溪邊將殺之溪際有大山石壁高數十丈娥仰天呼曰皇天有神不我為何罪而當如此因奔走向山山高開廣數丈平路如砥羣賊

亦逐娥入山山遂崩合泯然如初賊皆壓死山裏頭出
山外娥遂隱不復出娥所汲器化為石形頭似鷄土人
號曰鷄山其水為娥潭

幽明錄

捷為叔先泥和其女名雄永建三年泥和為縣功曹縣
長趙祉遣泥和拜檄謁巴郡太守以十月乘船於城湍
墮水死尸喪不得雄哀慟號咷命不圖存告弟賢及夫
人令勤覓父尸若求不得吾欲自沉覓之至十二月十
五日父喪不得雄乘小船於父墮處哭泣數聲竟自投

水中旋流沒底見夢告弟云至二十一日與父俱出至
期如夢與父相持并浮出江

搜神記

諸暨東滂里屠氏女父失明母痼疾親戚相棄鄉里不
容女携父母遠住苧蘿樵採夜紡績以供養父母俱卒
親營殯葬負土成墳忽聞空中有聲云汝至性可重山
神欲相驅使汝可為治人病必得大富女謂是魃魅弗
敢從遂得病積時隣舍人有中溪蜮毒者女試治之自
覺病便差遂以巫道為人治疾無不愈家產日益鄉里

多欲娶之以無兄弟誓守墳墓不肯嫁為山賊劫殺齊南

書

永興中有王氏女年五歲得毒病兩目皆盲性至孝年二十父亡盲女臨屍一叫眼皆血出小妹為舐之左眼即開愈時人皆以孝感所致也上

蘭陵蕭矯妻羊氏至孝居父喪哭吐血母疾晝夜祈禱忽一人自稱枯桑君曰若人無患令泄氣於居西南求白石鎮之言訖不見明日如言疾愈

羊緝之女佩任母亡不飲食三日而死鄉里號曰女表
緝氏女玉為父報讐吏執玉以告外黃令梁配欲論殺
玉申屠蟠時年十五進諫曰玉之節義足以感無耻之
孫激忍辱之子不遭明時尚當表旌廬墓況在清聽而
不加哀矜配善其言乃為減死論

列女傳

酒泉烈女龐娥親者表氏龐子夏之妻祿福趙君安之
女也君安為同縣李壽所殺娥親有男弟三人皆欲報
讐壽深以為備會遭災疫三人皆死壽聞大喜請會宗

族共相慶賀云趙氏彊壯已盡唯有女弱何足復憂防
備懈弛娥親子消出行聞壽此言還以啟娥親娥親既
素有報讐之心及聞壽言感激愈深愴然隕涕曰李壽
汝莫喜也終不活汝戴履天地為吾門戶吾三子之羞
也焉知娥親不手刃殺汝而自徼倖邪陰市名刀挾長
持短晝夜哀酸志在殺壽壽為人凶豪聞娥親之言更
乘馬帶刀鄉人皆畏憚之比隣有徐氏婦憂娥親不能
制恐逆見中害每諫止之曰李壽男子也凶惡有素加

今備衛在身趙雖有猛烈之志而強弱不敵邂逅不制
則為重受禍於壽絕滅門戶痛辱不輕也願詳舉動為
門戶之計娥親曰父母之讐不同天地共日月者也李
壽不死娥親視息世間活復何求今雖三弟早死門戶
泯絕而娥親猶在豈可假手於人哉若以卿心況我則
李壽不可得殺論我之心壽必為我所殺明矣夜數磨
礪所持刀訖扼腕切齒悲涕長歎家人及隣里咸共笑
之娥親謂左右曰卿等笑我直以我女弱不能殺壽故

也要當以壽頸血汚此刀刀令汝輩見之遂棄家事乘鹿車伺壽至光和二年二月上旬以白日清時於都亭之前與壽相遇便下車扣壽馬叱之壽驚愕廻馬欲走娥親奮刀斫之并傷其馬馬驚壽擠道邊溝中娥親尋復就地斫之探中樹蘭折所持刀壽被創未死娥親因取壽所佩刀殺壽壽護刀瞑目大呼跳梁而起娥親乃挺身奮手左抵其額右樁其喉反覆盤旋應手而倒遂拔其刀以截壽頭持詣都亭歸罪有司徐步詣獄辭顏

不變時祿福長漢陽尹嘉不忍論娥親即解印綬去官
弛法縱之娥親曰讐塞身死妾之明分也治獄制刑君
之常典也何敢貪生以枉官法鄉人聞之傾城奔往觀
者如堵焉莫不為之悲喜慷慨嗟歎也守尉不敢公縱
陰語使去以便宜自匿娥親抗聲大言曰枉法逃死非
妾本心今讐人已雪死則妾分乞得歸法以全國體雖
復萬死於娥親畢足不敢貪生為明廷負也尉故不聽
所執娥親復言曰匹婦雖微猶知憲制殺人之罪法所

不縱今既犯之義無可逃乞就刑戮隕身朝市肅明王
法娥親之願也辭氣愈厲面無懼色尉知其難奪彊載
還家涼州刺史周洪酒泉太守劉斑等並共表上稱其
烈義刊石立碑顯其門閭太常弘農張奐貴尚所履以
東帛二十端禮之海內聞之者莫不改容贊善高大其
義故黃門侍郎安定梁寬追述娥親為其作傳

皇甫謐
龐娥親

傳

荀崧小女灌幼有奇節崧為襄城太守為杜曾所圍力

弱食盡欲求救於故吏平南將軍石覽計無從出灌時
年十三乃率勇士數十人踰城突圍而出賊追甚急灌
督厲將士且戰且前得入魯陽山獲免自詣覽乞師又
為松書與南中郎將周訪請援仍結為兄弟訪即遣子
撫率三千人會石覽俱救松賊聞兵至散走灌之力也

華陽
國志

秦家有好女自名曰女休休年十四五為宗行報讎左

執白陽刀右據宛景矛

樂府
歌

廣博物志卷二十三

欽定四庫全書

廣博物志卷二十四

明 董斯張 撰

閨壺二

妬婦

美人

孕育

穉紀女婦

尼

婢 變異

叔向之母妬叔虎之母美而不使其子皆諫其母曰深山大澤實生龍蛇余懼其生龍蛇以禍女余何愛焉使往視寢生叔虎美而有勇力藥懷子嬖之故羊舌氏之族及於難國語

杜蘭香降張碩碩妻無子取妾妻妬無已碩謂香如此
云何香曰此易治耳言卒而碩妻患創委頓碩曰妻將
死如何香曰此創所以治妬創已亦當瘥數日之間創
損而妻無妬心遂生數男

杜蘭香
別傳

武歷陽女嫁阮宣武絕忌家有一桃樹花葉灼耀宣歎
美之即便大怒使婢取刀斫樹摧折其花

妬女
記

宋世諸主莫不嚴妬太宗疾之湖孰令袁愔妻以妬忌
賜死使近臣虞通之撰妬婦記左光祿大夫江湛孫敷

當尚世祖女上使人為數作表讓婚曰伏承詔旨當以
臨海公主降嬪榮出望表恩加典外顧審輔蔽伏用憂
惶臣寒門賴族人凡質陋間間有對本隔天姻如臣素
流室貧業寡年近將冠皆已有室荆釵布裙足得成禮
每不自解無偶迄茲謀訪莫尋素族弗問自惟門慶屬
降公主天恩所覃容及醜末懷憂抱惕慮不獲免徵命
所當果膺茲舉雖門秦宗榮於臣非幸仰緣聖貸冒陳
愚實自晉氏以來配尚王姬者雖累經美胄亟有名才

至如王敦懾氣桓溫斂威真長佯愚以求免于敬炙足以違詔王偃無仲都之質而裸露於北階何瑀闕龍工之姿而投軀於深井謝莊殆自同於矇瞶殷冲幾不免於強鋤數人者非無才意而勢屈於崇貴事隔於聞覽吞悲茹氣無所逃訴制勒甚於僕隸防閑過於婢妾往來出入人理之常當賓待客用從之義而令掃轍息駕無闕門之期廢筵抽席絕接對之理非惟交友離異乃亦兄弟踈濶第令受酒肉之賜制以動靜監子荷錢帛

之私節其言笑姆奶爭媚相勸以嚴妮媼競前相諂以
急第令必凡庸下才監子皆葭萌愚豎議舉止則未閑
是非聽言語則謬於虛實姆奶敢恃耆舊唯贊妬忌妮
媼自倡多知務檢口舌其間又有應答問訊卜筮師母
乃至殘餘飲食詰辨與誰衣被故敝必責頭領又出入
之宜繁省難衷或進不獲前或入不聽出不入則嫌於
欲疏求出則疑有別意召必以三晡為期遣必以日出
為限夕不見晚魄朝不識曙星至於夜步月而弄琴晝

拱袂而披卷一生之內與此長乖又聲影裁聞則少婢
奔迸裾袂向席則老醜叢來左右整刷以疑寵見嫌賓
客未冠以少容致斥禮則有劉媵象則有貫魚本無嫚
嫡之嫌豈有輕婦之誚況今議絕傍和虔恭正匹而每
事必言無儀適設辭輒言輕易我又竊聞諸主集聚唯
論夫族緩不足為急者法急則可為緩者師更相扇誘
本其恒意不可貸借固實常辭或言野敗去或言人笑
我雖家曰私理有甚王憲發口所言恒同科律王蓰雖

復彊佷頗經學涉戲笑之事遂為寃魂褚暖憂憤用致
天絕傷理害義難以具聞夫螽斯之德實致充昌專妬
之行有妨繁衍是以尚主之門往往絕嗣駙馬之身通
離釁咎以臣凡弱何以克堪必將毀族淪門豈伊身青
前後嬰此其人雖衆然皆患彰遐邇事觸天朝故吞言
咽理無敢論訴臣幸屬聖明矜照由道弘拓以典處親
以公臣之鄙懷可得自盡如臣門分世荷殊榮足守前
基便預提拂清官顯宦或由才升一叨婚戚咸有恩假

是以仰冒非宣披露丹實非唯止陳一已規全身願實
乃廣申諸門憂患之切伏願天慈照察特賜蠲停使燕
雀微羣得保叢蔚蠢物含生自己彌篤若恩詔難降披
請不申便當刊膚剪髮投山竄海

宋書

劉孝標云余與馮衍有三同敬通值中朝明君終不試
用子值英主亦擯棄當年一同也敬通雄才冠世志堅
金石子雖不及而節亮慷慨二同也敬通有忌妻至身
操井臼子有悍室亦令家道轆軻三同也

宋明帝憎婦人妬榮彥遠以善碁見親婦妬傷其面帝
曰為卿治之何如遠率爾曰聽聖旨其夕遂賜藥殺其
妻劉休妻王氏亦妬帝聞之賜休妾敕杖王二十令休
宅後開小店使王親賣掃帚皂荚以辱之

長粲性好內有一侍婢其妻妬而殺之大忿恨數年不
相見親表為之語曰自我不見于今三年

以下美人

昔者績陽強力四征重丘遺之美女績陽之君悅之焚
惑不治大臣爭權遠近不相聽國分為二

周書

紂囚文王於羑里散宜生受命而行宛懷條塗之山有

玉女三人宜生得之因費仲而獻之於紂以免文王

六韜

赤鳥之人獻二女於天子以為嬖人赤鳥美人之地

天穆

子傳

旋波夷光越之美女進於吳王肌香體輕飾以珠幌若
雙旌之在煙霧

越謀滅吳蓄天下奇寶美人異味進於吳越又有美女
二人一名夷光二名修明以貢於吳吳處以椒華之房

貫細珠為簾幌朝下以蔽景夕捲以待月二人當軒並坐理鏡靚粧於珠幌之內竊窺者莫不動心驚魂謂之神人吳王妖惑忘政及越兵入國乃抱二女以逃吳苑越軍亂入見二女在樹下皆言神女望而不敢侵今吳城蛇門内有朽株尚為祠神女之處

拾遺記

西施越之美女欲見者先輸金錢一文

孟子注疏

宋玉東家女因玉見棄誓不他適膏沐不施恒以帛帶交結胸前後搵織作以自給後人效之富家至以珠玉

寶花飾錦繡流蘇帶束之以增妖冶浸失其制矣

緝柳編

琴引秦時倡屠門高所作也秦為無道奢淫不制徵天下美女以充後宮乃縱酒離宮作戲倡優宮女侍者千餘人屠門高見宮女幼妙寵麗於是援琴作歌曲未及終琴折柱摧絃音不鳴舍琴而更援他琴以續之

廣延國來獻善舞者二人一名旋娟一名提謨並玉質凝膚體輕氣馥飲以瑤珉之膏飴以丹泉之粟其舞一名紫塵言其體輕與塵相亂次曰集羽言其婉轉若羽

毛之從風末曲曰旋懷言其肢體纏曼若入懷袖也乃設麟文之席散荃蕪之香香出波弋國浸地則土石皆香著朽木腐草莫不鬱茂以燠枯骨則肌肉皆生以屑噴地厚四五寸使二女舞其上終日無跡體輕故也拾記

秦惠公以美女遺蜀王死葬之石鏡王追思之作幽魄之曲

琴操

武都丈夫化為女子美而艷蓋山精也蜀王納為妃不

習水土欲去王留之作東平歌以樂之未幾物故王悲
悼乃作史邪歌龍歸曲 上

楚襄王遊雲夢夢一婦人名曰瑤姬曰我夏帝之季女
也封於巫山之陽臺精魄為芝媚而服焉則與夢期也

襄陽者
舊傳

漢武帝令宮人為八字眉梁冀妻孫壽改翠眉為愁眉
魏武帝令宮人掃青黛眉連心細長謂之蛾眉粧西子
母浣帛於溪有明珠射體感而孕又夢有翠雞五色自

空而下久之化為鶚飛去

翰府名談

帝所幸宮人名麗娟年十四玉膚柔軟吹氣勝蘭不欲衣纓拂之恐體痕也每歌李延年和之於芝生殿唱迴風之曲庭中花皆翻落置麗娟於明離之帳恐塵垢汚其體也帝常以衣帶縛麗娟之袂閉於重幙之中恐隨風而去也麗娟以琥珀為佩置衣裾裏不使人知乃言骨節自鳴相與為神怪也

洞冥記

王昭君姊歸人也有香溪即昭君常遊翫處

郡國志

伶玄字子干買妾樊通德有才色知書慕司馬遷史記頗能言趙飛燕姊弟故事子干閒居命言厭厭不倦子干曰斯人俱灰滅矣當時疲精力驚嗜欲蠱惑之事寧知終歸荒田野草乎通德占袖顧眄燭影以手擁髻悽然泣下曰夫淫於色非慧男子不至也慧則通通則流流而不得其防則百物變態為溝為壑無所不往焉禮義成敗之說不能止其流唯感之以盛衰奄忽之變可以防其壞今婢所道趙后姊弟事盛之至也主君恨然

有荒田野草之悲衰之至也婢子拊形屬影識夫盛之不可留衰之不可推俄然相緣奄忽雖婕妤好聞此不少

遣乎

飛燕外傳

陳忠女名豐隣人葛勃有美姿豐與村中數女戲相謂曰得婿如葛勃無恨也

異苑

陳豐與葛勃屢通音問而歡會未由七月七日豐以青蓮子十枚寄勃勃啖未竟墜一子於盆水中有喜鵲過惡汚其上勃遂棄之明早有並蒂花開於水面如梅花

大勃喜曰吾事濟矣取置几頭數日始謝房亦漸長割之各得實五枚如豐來數即書其異以報豐自此鄉人改雙星節為雙蓮節

賈子說林

孫亮作琉璃屏風甚薄而瑩澈每於月下清夜舒之常與愛姬四人皆振古絕色一名朝姝二名麗居三名洛珍四名潔華使四人坐屏風內而外望之如無隔惟香氣不通於外為四人合四氣香殊方異國所出凡經踐躡宴息之處香氣沾衣歷年彌盛百浣不歇因名曰百

濯香或以人名香故有朝姝香麗居香洛珍香潔華香
所居室名為思香媚寢

拾遺記

夏統從父祀先人迎女巫章丹陳珠二人並有國色莊
服甚麗善歌舞又能隱形匿影吞刀吐火統破藩而走
歸責諸人曰昔淫亂之俗興衛文公為之悲惋螭螽之
氣見君子尚不敢指季桓納齊女仲尼載馳而退子路
見夏南憤恚而忼慨吾常恨不得頓叔向之頭搗華父
之眼柰何諸君迎此妖物夜與遊戲放傲逸之情縱奢

淫之行亂男女之禮破高貞之節何也遂隱床上披髮

而卧不復言

晉書

綵珠姓梁白州人

小傳

翔風因李倫見棄聽寒蛩心悲因織寒蛩之褥以獻之

石崇有妓善投壺隔屏風投之

晉書

何充後閤妓以翡翠指環換刺繡筆歎曰此物洞仙與
吾欲保長年之好乃令蒼頭急以蜻蜓帽贖之

粧樓記

石虎有馬妓著朱衣進賢冠立於馬上馬定而作書字

皆端正

石虎鄴中記

臨州王宏後庭數百千人皆極天下之選所幸江無畏
服玩侔於齊東昏潘妃寶屨直千萬

梁書

羊侃善音律自造採蓮棹歌兩曲甚有新致姬妾侍列
窮極奢靡有彈箏人陸太喜著鹿角爪長七尺儻人張
淨琬腰圍一尺六寸時人咸推能掌中舞又有孫荆玉
能反腰帖地啣得席上玉簪

上

高陽王雍有二美姬一名修容二名艷姿並蛾眉皓齒

潔貌傾城修容亦能為綠水歌艷姿善大鳳舞並愛傾

後室寵冠諸姬

洛陽伽藍記

河內人色美善歌其夫貌醜而好酒醉歸常毆其妻故其歌多為怨苦之詞或演其曲而被之管絃以歌時每

搖其身因號為踏搖娘曲

琴操

洛陽進合蒂花得之嵩山塢中人不知名採者異之會煬帝駕適至因名迎輦花濃艷芬馥或惹襟袖移時不散嗅之令人不睡命御車女袁寶兒持之號司花女時

虞永興世南草征遼德音於側寶兒注視之帝曰昔傳
飛燕可掌上舞今得寶兒方昭前事然多憨態今注目
於卿卿可便嘲之虞為絕句曰學畫鴉黃半未成垂肩
鞞袖太憨生緣憨却得君王惜長把花枝傍輦行帝稱

美

大業
拾遺

帝登鳳舸凭殿脚女吳絳僊肩喜其柔麗不與羣輩齒
愛之甚久不移步絳僊善畫長蛾眉帝色不自禁輦召
絳僊將拜婕妤適值絳僊下嫁為玉工萬郡妻故不克

諧帝寢興罷擢為龍舟首楫號曰崆峒夫人

妬記。以下孕育。

一產二子者當以後生者為兄言其先胎也荅曰此野人之鑿語耳君子不測暗安知胎之先後也

周哀公之八年鄭有人一生四十子其二十人為人二十死其九年晉有豕生人能言吳赤烏七年有婦人一

生三子

按神記

哀帝建平四年四月山陽方與女子田無嗇生子未生二月前兒啼腹中及生不舉葬之陌上後三日有人過

聞兒啼聲母因掘收養之

搜神記

漢平帝元始元年六月長安有女子生兒兩頭兩頸面俱相向四臂共胸俱前向尻上有目長二寸所京房易傳曰睽孤見豕負塗厥妖人生兩頭下相攘善妖亦同人若六畜首目在下茲謂亡上政將變更厥妖之作以譴失正各象其類兩頸下不一也手多所任邪也足少下不勝任或不任下也凡下體生於上不敬也上體生於下媾瀆也生非其類姪亂也人生而大上速成也生

而能言好虛也羣妖推此類不改乃成凶也

靈帝光和二年洛陽上西門外女子生兒頭異肩共胸俱前向以為不祥墮地棄之自是後朝廷霧亂政在私門上下無別二頭之象後董卓戮太后被以不孝之名放廢天子後復害之漢元以來禍莫踰此

靈帝中平元年六月壬申雒陽男子劉倉居上西門外妻生男兩頭共身至建安中女子生男亦兩頭共身

晉懷帝永嘉元年吳郡吳縣萬詳婢生一子鳥頭兩足

馬蹄一手無毛尾黃色大如椀

並上

建興四年西都傾覆元皇帝始為晉王四海宅心其年十月二十二日新蔡縣吏任僑妻胡氏年二十五產二女相向腹心合自胸以上臍以下分此蓋天下未壹之妖也時內史呂會上言案瑞應圖云異根同體謂之連理異畝同類謂之嘉禾草木之屬猶以為瑞今二人同心天垂靈象故易云二人同心其利斷金休顯見生於陳東之國斯蓋四海同心之瑞不勝喜躍謹畫圖上時

有識者哂之

晉元帝大興三年十二月謝平妻生女墮地漚漚有聲
須臾便死鼻目皆在頂上面處如項口有齒都連為一
胸如鰲手足爪如鳥爪皆下勾此亦人生他物非人所
見者後二年王敦反有石頭之敗

常山趙宣母妊身如常而髀上癢搔之成瘡兒從瘡出

母子平安

異死

劉毅討桓修之桓遣人擒得毅妻郭美送與玄遂寵擅

諸姬有身及立敗郭還遂產一兒一鼠殺怒殺兒鼠走
枯莽中其後郭病死方殮鼠忽來跳入棺內

元嘉中高平平丘孝婦懷妊生一團冰得日便消液成
水

魏郡徐達字君及婦平昌孟氏生兒頭有一角一脚頭
止仰向通身盡赤落地無聲乘虛而去

並上

昔燕趙之間有三男子共娶一女生四子后爭訟廷尉
延壽奏云禽獸生子逐母宜以四子還母尸三男子於

市

譙周
法訓

昔陽翟有婦人妊身三十月乃生子五歲便入此山學

道神明為母立祠因號曰開母祠焉

嵩高
山記

太原溫磐石母懷身三年然後生墮地便坐而笑髮覆

面牙齒皆具

異
苑

梁武帝太清元年丹陽有莫氏妻生男眼在頂上大如
兩歲兒墮地而言曰兒是早疫鬼不得住母曰汝當令
我得過疫鬼曰有上官何得自由母可急作絳帽故當

無憂母不暇作絳帽以絳繫髮自是早疫者二年揚徐
兗豫尤甚莫氏鄉隣多以絳免他土效之無驗

後魏肅宗熙平二年并州祈縣人韓僧真女從母右脇
而出胡太后令付掖庭養之太后臨朝為元人劉騰幽
於永巷後竟被爾朱榮沉於河魏室因滋大亂

高構馮翊武鄉女子焦氏既痘又聾嫁之不售嘗樵採
於野為人所犯而有孕遂生一男年六歲莫知其姓於
是申省構判曰母不能言窮究理絕按風俗通姓有九

種或氏於爵或氏所居此兒生在武鄉可以武為姓

北史

昔王舍城有一長者其家巨富庫藏盈溢如毘沙門然無子肩禱祀神祇求乞有子其婦不久便覺有身滿足十月生一男兒是兒先世宿植福因初生之日其手一指指出大光明明照十里

燈指經

佛在世時王舍城中有一長者財寶無量不可稱計其婦足滿十月便欲產子然不肯出尋重有身足滿十月復產一子先懷者住在右脇如是次第懷妊九子各滿

十月而產唯先一子故在胎中不肯出外其母極患設湯藥以自療治病無降損囑及家中我腹中子故活不死今若設終必開我腹取子養育其母於時不免所患即便命終時諸親眷屬載其尸骸詣諸塚間請大醫者婆破腹看之得一小兒形狀故小頭鬚皓白俯偻而行四向顧視語諸親言汝等當知我由先身惡口罵辱衆僧故處此熟藏中經六十年受是苦惱難可匹當諸親聞已號啼悲哭不能答之爾時世尊遙知此兒善根已

熟將諸大衆往到尸所小兒言汝是長老比丘不荅言
實是第二第三亦如何故言道是時諸大衆此小兒
與佛答對各懷疑惑前白佛言今此老兒宿造何業在
腹髮白俯偻而行復與如來共相答問爾時世尊告諸
大衆此賢劫中有佛出世號曰迦葉有諸比丘夏望安
居衆僧和合差一比丘年在老耄為僧維那共立制限
於此夏望要得道者聽共自恣若未得者不聽自恣今
此維那獨不得道僧皆不聽布薩自恣心懷懊惱而作

是言我獨為爾營理僧事令汝等輩安隱行道今復還
返更不聽自恣布薩羯磨即便瞋恚罵辱汝衆僧尋即
牽捉閉著室中作是唱言使汝等輩常處暗冥不見光
明如我今者處此暗室作是語已自戮命終墮地獄中
受大苦惱今始得脫故在胎中受是苦惱衆僧聞已各
護三業厭離生死得四沙門果者有發辟支佛心者有
發無上菩提心者時諸親屬還將老兒詣家養育年漸
長大放令出家得阿羅漢果

百緣經

有一國王小夫人生一肉團大夫人妬之作木函棄之
常河水後河邊人得之肉破生十小兒勇健欲伐父王
國小夫人以乳五百道射小兒口遂弛弓伏號為賢劫

千佛

以下雜
紀女婦

周宣王始稱其女曰公主諸侯女曰翁主魏文帝始稱
主壻曰駙馬唐太宗始稱諸王女曰郡主諸侯女曰縣

主物

齊莊王始封婦人以食邑漢武帝始封婦人為郡君縣

君王莽始加婦人夫人號宋文帝始封婦人為國夫人

孟嘗君號其母薛公大家

並上

玉女天賜妾也禮含文嘉曰禹卑宮室盡力溝洫百谷

用成神龍女降

宋書

魏豹字叔虎范陽人也遷中山太守所在有治名豹嬖

妾先死豹後守於廩丘南妾形見與豹言翌日而卒

崔鴻

十六國

春秋

廬江太守華令思高才達學洽聞之士也妾名瑤華者

已死乃見形與之言語如平生

抱朴子

齊王厚送女欲妻屠牛吐屠牛吐辭以疾其友曰子終死腥臭之肆而已乎何為辭之吐應之曰其女醜其友曰子何以知之吐曰以吾屠知之其友曰何謂也吐曰吾肉善而去若少耳吾肉不善雖以吾附益之尚猶賈不售今厚送子子醜故耳其友後見之果醜傳曰目如

擗杏齒如編貝

韓詩外傳

漢陳留考城史妲字威明年少時嘗病臨死謂母曰我

死當復生埋我以竹杖柱於瘞上若杖折掘出我及死
埋之柱如其言七日往視杖果折即掘出之已活走至
井上浴平復如故後與鄰船至下邳賣鋤不得售云欲
歸人不信之曰何有千里暫得歸耶荅曰一宿便還即
取書報以為驗實一宿便還果得報考城令江夏鄆賈
和姊病在鄰里欲急知消息請往省之路遙三千里再
宿還報

搜神記

漢建安中南陽賈偶字文合得病而亡時有吏將詣太

山司命閱簿謂吏曰當召某郡文合何以召此人可速遣之時日暮遂至郭外樹下宿見一女獨行文合問之女曰某三河人父為弋陽令昨被召而來今得却還望君之容必是賢者是以停留依馮左右文合曰悅子之心願交懽於今夕女曰聞之諸姑女子以貞專為德潔白為稱文合反覆與言終無動志天明各去文合卒已再停宿少頃却蘇文合欲驗其事遂至弋陽修刺謁令因問曰君女寧卒而却蘇耶具說本末令入問女所言

皆同初大驚歎竟以女配文合焉

上

女色者世間之枷鎖凡夫戀著不能自拔女色者世間之重患凡夫困乏至死不免女色者世間之衰禍凡夫遭之無厄不至行者既得捨之若復顧念是為從獄得出還復思入從狂得正而復樂之從病得差復思得病智者怒之知其狂而顛蹶死無日矣凡夫重色甘為之僕終身馳驟為之辛苦雖復鐵質寸斬鋒鏑交至甘心受之不以為患狂人樂狂不是過也行者若能棄之不顧

是則破枷脫鎖惡狂厭病離於衰禍既安且吉得出牢
獄永無患難女人之相其言如蜜而其心如毒譬如停
淵澄鏡而蛟龍居之金山寶窟而師子處之當知此害
不可暫近室家不和婦人之由毀宗敗族婦人之罪實
是陰賊滅人慧明亦是獵圍麋得出者譬如高羅羣鳥
落之不能奮飛又如密網衆魚投之剝腸俎几亦如暗
坑無目投之如蛾赴火是以智者知而遠之不受其害
惡而穢之不為此物之所惑也

日明菩薩經

佛告李女好邪淫者有五自妨一多聲不好二王法所
疾三懷異多疑四死入地獄五地獄罪竟受畜生形皆
罪所致能自滅心不邪淫者有五增福一多人稱譽二
不畏縣官三身得安隱四死上天生五從立清淨得泥

洹道

泥洹經

國王有女名曰狗牟頭有捕魚師名術波伽隨道而行
遙見王女在高樓上牕中見面想像染著心不暫捨彌
歷日月不能飲食母問其故以情答母我見王女心不

能忘母喻兒言汝是小人王女尊貴不可得也兒言我心願樂不能暫忘若不如意不能活也母為子故入王宮中常送肥魚鳥肉以遺王女而不取價王女怪而問之欲求何願母白王女願却左右當以情告我唯有一子敬慕王女情結成病死不云遠願垂愍念賜其生命王女言汝去至月十五日於某甲天祠中住天像後母還語子汝願已得告之如上沐浴新衣在天像後住王女至時白其父王我有不吉須至天祠以求吉福王言

大善即嚴車五百乘出至天祠既到勅諸從者齊門而止獨入天祠天神思惟此不應爾王為施主不可令此小人毀辱王女即厭此人令睡不覺王女既入見其睡重推之不寤即以瓔珞直十萬兩金遺之而去後此人得覺見有瓔珞又問衆人知王女來情願不遂憂恨懊惱姪火內發自燒而死以是證知女人之心不擇貴賤

唯欲是從

法苑珠林

昔有四姓藏婦不使人見婦值青衣人作地突與琢銀

兒私通夫後覺婦婦言我生不邪行卿莫妄語夫言吾不信汝當將汝至神樹所立誓婦言甚佳夫持齋七日始入齋室婦密語琢銀兒汝詐作狂亂頭於市逢人抱持牽引棄之夫齋竟便將婦出婦言我不見市卿將我過市琢銀兒便來抱持詐狂卧地婦便哮呼其夫何為使人抱持我耶夫言此是在人何須記錄夫婦俱到神所叩頭言我生來不作惡但為狂人所抱婦便得活夫默然而慙佛言當知一切女人奸詐如是不可信也

昔有大姓家子端正以金作女像語父母言有女似此者兒乃當取時他國有女貌亦端正亦作金男白父母言有男似此乃當嫁之父母各聞便遠聘合時國王舉鏡自照謂羣臣曰天下人顏有如我不諸臣答曰臣聞彼國有男端正無比則遣使請之使至告之王欲見賢者則嚴車進去已自念王以我明達故來相呼則還取書而見婦與奴為奸悵然懷憾為之結氣顏色衰醜臣見如此謂行道消瘦馬廐安之夜於廐中見王正大夫

人與馬下人私通心乃自悟王太夫人尚當如此何況
我婦意解心悅顏色如故則與王相見王曰何因止外
三日答曰臣來有忘還歸取之而見婦與奴為奸意忿
顏色衰變故往廐中三日昨見正夫人來與養馬兒私
通夫人乃爾何況餘人意解顏色復故王言我婦尚爾
何況凡女兩人俱捨便入山中剃髮作僧思惟女人不
可從事精進不懈俱得辟支佛道

譬喻
經

昔有婦人生一女端正無比年始三歲國王取視呼道

人相後堪為夫人不道人報王此女有夫王後得之王
言我當牢藏豈可後得便呼鶴來汝處在何鶴白王言
我在大山半腹有樹人畜不歷下有洄水舡所不行王
言我以此女寄汝將養便撮持去日日從王取飯與女
如是久後上有一卵卒為水漂去有一樹竒逐水下流
有一男子得抱持樹墮洄水中不得去廼有蒲桃樹踊
出住倚山傍男子尋之得上鶴樹與女私通女便藏之
鶴覺女身重左右求得男子舉撮棄之如事白王王曰

前道人善功相人也師曰人有宿對非力所制逢對則可畜生亦爾上

目連到大海邊見一新死端正女人見有一蟲從其口出還從鼻入復從眼出從耳而入目連觀已捨之而去弟子問言是何女人答言此是舍衛城中大薩薄婦容貌端正世間少雙其婦常以三奇木頭擎鏡照面自覩端正便起憍慢深自愛著夫甚敬愛將共入海海惡船破沒水而死漂出在岸此薩薄婦由自愛身死後還生

在故身中作此蟲也

法苑珠林

渤海太守吏良好一女子許而不果良斷其頭而歸投於竈下曰當令火葬頭語曰使君我相從何圖當爾

神搜

記

顧愷之嘗悅一鄰女挑之不從乃圖其形於壁以棘鍼釘其心女遂患心痛愷之因致其指女從之遂密去鍼

而愈

晉書

董卓孫女名白時尚未笄封為渭陽君於郿城起壇從

廣二丈餘高五六尺使白乘金華青蓋車都尉中郎將
刺史二千石在郿者各令乘軒轎筆為白導從之壇上
使兄子橫為使者授印綬也

英雄記

吳興餘不鄉有女囚山又曰女獄山漢姚恢以柯田山
水嘉甚謀居其女洩之於姻沈戎家奪之恢憤其女賺
女歸寧囚之苧溪之北山墟間至死不悔仍戒其後三
世不舉女戎字威卿說降劇賊尹良光武嘉之功封海

昏侯不受

經圖

廣平人李波宗族彊盛殘掠不已公私咸患百姓為之
語曰李波小妹字雍容褰裙逐馬如卷蓬左射右射必
叠雙婦女尚如此男子安可逢

華陽
國志

瑯琊王獻之保母姓李名意如廣漢人也在母家志行
高秀歸王氏柔順恭勤善屬文能草書解釋老旨趣年
七十興寧三年歲在乙丑二月六日無疾而終仲冬既
望葬會稽山陰之黃閼岡下殉以曲水小硯交螭方壺
樹雙松於墓上立貞石而志之悲夫後八百餘載知獻

之保母宮於茲土者尚焉

東陽女子婁逞變服詐為丈夫粗知圍碁解文義徧游
公卿仕至揚州議曹從事事發明帝驅令還東逞始作
婦人服而去歎曰如此伎還之為老嫗豈不惜哉

南史

時有女子年二十許散髮黃衣在武窟山石室中無所
修行唯不甚食或出人間時飲少酒鵝卵一兩枚人呼
為聖姑就求子往往有効

上

昔佛在世時波斯匿王婦末利夫人產生一子字曰金

剛面貌極醜身體麤澀頭髮麤強王見不喜勅閉深宮
不令出外年漸長大任當嫁娶便遣一臣推覓一人本
是豪族今貧乏者卿可將來臣授勅已覓得付王王將
屏處密私語言聞卿豪族今者貧窮我有一女面貌極
醜卿幸納受當相供給時此貧人跪白王曰正使大王
以狗見賜亦不敢違豈王女末利所生王即娶之為造
宅舍門戶七重王囑女夫自捉戶鈎出入牢閉勿使人
見王出財物供給女壻無所乏少拜為大臣後與豪貴

共為邑會聚會之契令婦共趣自餘諸人各將婦來唯
此大臣獨不將赴衆人疑怪彼人婦者或甚端正或甚
極醜不能顯現是以不來復於後會密共勸酒令使醉
卧解取門鈎遣其五人造家往看至家開門婦疑非夫
內自尅責懊惱而言我宿何罪為夫幽閉不覩日月即
便至心遙禮世尊願佛慈悲來到我前暫救苦厄佛知
其意即於女前地中涌出紺髮相現其女舉頭見佛髮
相敬心歡喜女髮自然如紺青色佛漸現面女心倍喜

面復端正惡相麤皮自然化滅佛悉現身令盡見之更增歡喜身體端正猶如天女佛便為說種種法要得須

陀洹果

法苑珠林

隋開皇末年代州人姓王為驃騎將軍在蒲州鎮守性好畋獵所殺無數有五男無女後生一女端美見者皆愛奇之父母鍾念不同凡人既還鄉里里人親族為作衣服而共愛養之女年七歲一旦失去無處求覓疑隣里戲藏訪問不見諸兄乘馬遠覓乃見去家三十餘里

馬追不及兄等以數十騎共圍而始得之口中作聲如
似兔鳴足上得刺盈掬經月餘日不食而死父母悲痛
不能自割良由父獵殃及女受合家齋戒練行不絕大
理寺丞宋宣明曾為代府法曹為臨說之。出冥報記
以下尼

漢明初立佛寺同梵福量時後宮陰夫人王嬃好等一
百九十人出家司空陽城侯劉善峻等二百六十人出

家

法本內傳
譯經圖記

東晉何充始捨宅安尼此尼之始也

宋倫氏二女東官曾城人也是時祖姊妹元嘉九年姊
年十歲妹年九歲里越愚蒙未知經法忽以二月八日
並失所在三日而歸粗說見佛九月十五日又失一旬
還作外國語誦經及梵書見西域沙門便相開解明年
正月十五忽復失之曰間作人云見其從風徑飄上天
父母號懼祀神求福既而經月乃返剃頭為尼被服法
衣持髮而歸自說見佛及比丘尼曰汝宿世因緣應為
我弟子舉手摩頭髮因隨落與其法名大曰法緣小曰

法綵臨遣還日可作精舍當與汝經法也女既歸家即
毀除鬼座繕立精廬夜齊誦經夕中每有五色光明流
泛峰嶺若燈燭二女自此後從容止華雅音制詮正上
京風調不能過也

冥祥記

高聰有妓十餘人及病不欲適他人並令燒指吞炭出

家為尼

海錄

佛在世時迦毗羅衛城中有一長者名曰瞿沙其婦生
女端正殊妙有白氎衣裹身而生因為立字名曰淨年

漸長大衣亦隨長鮮白淨潔不煩浣染衆人見之競共
求索白父母言我今不貪世俗榮華願樂出家父母愛
念不能違逆尋將佛所求索入道佛告善來比丘尼頭
髮自落身上白衣化為袈裟成比丘尼精勤修習得阿

羅漢果

百緣經

佛在世時波羅奈國有梵摩達王其婦生女身被袈裟
端正殊妙世所希有因為立字名伽尸孫陀利年漸長
大衣亦隨大稟性賢善慈仁孝順將諸侍衛出城遊戲

漸次往到鹿野苑中見佛相好心懷喜悅前禮佛足却
坐一面佛為說法心開意解得須陀洹果

上。以下婢

桓公使管仲求甯戚甯戚應之曰浩浩乎管仲不知至
中食而慮之婢子曰公何慮管仲曰非婢子之所知也
婢子曰公其母少少母賤賤昔者吳干戰未訖不得入
軍門國子擯其齒遂入為干國多

戰功
日多

百里奚秦國之

飯牛者也穆公舉而相之遂霸諸侯由是觀之賤豈可
賤少豈可少哉管仲曰然公使我求甯戚甯戚應我曰

浩浩乎吾不識婢子曰詩有之浩浩者水育育者魚未
有室家而安名我居甯子其欲室乎

管子

濟陰戎良字子恭年十八為郡門幹良儀容佳麗太守
諸葛禮使寫書從者誣良與婢通良剝腹示禮赤心

後漢

書

潁川庾嘉德善於筮蔡之事有人失一婢庾卦云君可
出東陵口伺候有姓曹乘車者無問識否但就其載得
與不得殆一理也旦出郭果有曹郎上墓徑便升車曹

大駭呼生驚奔入草刺一死屍下視乃其婢也

顧行常不宜兒子其婦將產求術於郭璞為作卦得家人之蒙其辭曰巽子在上變值蒙女蘿覆高松院養徵火捍其凶養子之人名宜同法當字乳婢曰青蘿如其言呼兒果無恙

洞林

長婢來成左目失明動則入井已死復生次婢良信有桓公司馬之癖行步雖曠了無前進隱疾難明辭不盡韻小婢從成南方之奚形如驚瘴言語嘍噀聲音駭人

惟堪驅雞它無所後遣詣阿嵇復被狗咋困熟如泥晁道

元與天

公賤

到撫有愛婢陳玉珠宋明帝遣求不與逼而奪之撫頗怨帝令有司誣奏將殺之撫入獄數宿鬚鬢皆白免死

繫上方奪封

南史

齊吏部侍郎房文烈未嘗嗔怒經霖雨絕糧遣婢糴米因爾逃竄三四許日方復擒之房徐曰舉家無食汝何處來竟無捶撻嘗寄人宅奴婢撤屋為薪略盡聞之顰

賊卒無一言

顏氏家訓

冠軍將軍郭文遠堂宇園林匹於邦君時隴西李元謙能雙聲語常經文遠宅前過見其闕闔華美乃曰是誰第宅遇值婢春風出曰郭冠軍家元謙曰此婢雙聲春風曰獐奴慢罵元謙服婢之能

洛陽伽藍記以下變異

魏襄王三年有女子自首化為丈夫與妻生子故京房易傳曰女子化為丈夫茲謂陰昌賤人為王丈夫化為女子茲謂陰勝陽厥咎亡也


搜神記

哀帝建平中豫章有男子化為女子嫁為人婦生一子
長安陳鳳曰陽變為陰將亡繼嗣自相生之象一曰嫁
為人婦生一子者將復一世乃絕故後哀帝崩平帝沒
而王莽篡焉

漢建安七年越雋有男子化為女子周羣曰哀帝時亦
有此變將有易代之事也至二十五年獻帝封山陽公
晉元康中安豐有女子曰周世寧年八歲漸化為男至
十七八而氣性成女體化而不盡男體成而不徹畜妻

而無子

上並



廣博物志卷二十四